

Begić Mustafa, dipl.pravnik, geod.inž.\*

## IGMAN '90 - UVODNI REFERAT

Savez geodetskih inženjera i geometara Bosne i Hercegovine nastavljajući tradiciju okupljanja i druženja geodeta BiH i ove 1990.godine, na prostranoj i pitomoj planini Igman, organizovao je TREĆE SUSRETE geodetskih inženjera i geometara Bosne i Hercegovine.

Učesnicima susreta ZOI hoteli IGMAN podarili su svu toplinu i ugodnost, kako se to čini dragim gostima. Sadržaje i prostore hotela koristilo je oko 600 učesnika susreta. Usluge smještaja i ishrane koristilo je oko 550 gostiju, a brojnim sportskim ekipama stavljani su na raspolaganje tereni i rekviziti za takmičenja.

Već u ranim poslijepodnevnim časovima 22.juna 1990.godine doputovali su učesnici iz udaljenijih opština BiH, a među njima je bilo dosta i onih koji žive u Sarajevu. Željeli su da se nadu na Igmanu prije početka susreta, da porazgovaraju sa kolegama iz razreda, razmijene mišljenja i upoznaju sa promjenama do kojih je došlo u protekloj godini, u vremenu između dva susreta.

Tu su prisutni nama dragi gosti iz drugih republika dr Bogdan Bogdanović, Eraković Jakov, Hristov Kosta, Demšar Božo i prof.dr Milenko Solarić. Susrete je pratio i uzeo učešća u radu i Srčan Sejfić predsjednik Saveza inženjera i tehničara Bosne i Hercegovine.

Za potpuniji sadržaj Susreta, potrudile su se i trgovinske kuće koje opštinske organe uprave, geodetske organizacije udruženog rada i druga preduzeća snabdijevaju geodetskim instrumentima, tehničkim priborima i računarskom opremom.

Brojne sportske ekipe takođe su na okupu, obilaze terene, a članovi organizacionog odbora zaduženi za sportska takmičenja obavljaju završne dogovore i pripreme za početak takmičenja.

Predsjednik organizacionog odbora i predsjednik Saveza geodetskih inženjera i geometara Bosne i Hercegovine mr. Mirsad Bakšić žuri da izvrši provjeru svih "karika u lancu" koji obezbjeđuje uspješno ostvarivanje Programa trećih susreta.

Program se sastoji iz stručnog dijela - rasprava o izmjenama i dopunama Zakona o premjeru i katastru nekretnina; i sportskih takmičenja u malom nogometu,

---

\* *Republička uprava za geodetske i imovinsko-pravne poslove, Sarajevo*

stonom tenisu, košarci, odbojci, šahu i streljaštvu. Zabavni dio programa je drugarsko veče.

Posebna brigada je posvećena smještaju učesnika i gostiju susreta. Na ovom poslu je angažovan dio organizacionog odbora na čelu sa mr Vladimirom Lukićem. To su i naši domaćini direktor hotela Marić Mile i rukovodilac radne jedinice hotela Hodžić Sejo. Organizaciju smještaja potpomogao je Geodetski zavod u Sarajevu sa kadrovima i računarskom opremom. Ovoga puta velik broj učesnika nije iznenadio ni organizatora ni hotelijere. Nije bilo zastoja u prijemu i smještaju učesnika, a naši domaćini - hotelijeri pobrinuli su se da besprijekorno funkcioniše restoran, bifei i drugi ugostiteljski sadržaji.

Do kasno u noć 22.juna družilo se, pjevalo i zabavljalo. To nije smetalo da se već u ranim jutarnjim satima, učesnici nađu za kafom i u restoranu.

U zakazano vrijeme 23.juna kongresna sala je bila do zadnjeg mjesta popunjena, mnogi su ostali na nogama jer više nije bilo slobodnih sjedišta.

Tačno u 9 sati za govornicu je stupio predsjednik organizacionog odbora mr Mirsad Bakšić i u prigodnoj besjedi upoznao učesnike sa ciljem susreta, i zadacima i aktivnostima geodetskih inženjera i geometara na transformaciji geodetske djelatnosti u Republici. Uputio je pozdrave i dobrodošlicu našim gostima, domaćinima i svim učesnicima Trećih susreta. Potom je proglasio da su Treći susreti otvoreni.

Učesnike Trećih susreta pozdravili su i poželjeli uspješan rad Jovo Miskin direktor Republičke uprave za geodetske i imovinsko pravne poslove, Demšar Božo direktor Republičke geodetske uprave Slovenije (u ime Međurepubličko-pokrajinskog kolegija za geodeziju) i Srčan Sejfić, predsjednik Saveza inženjera i tehničara Bosne i Hercegovine.

U radnom dijelu Susreta podnesen je veći broj saopštenja vezanih za ocjenu stanja u geodetskoj djelatnosti sa prijedlozima mjera i načinom zakonodavnog uređenja pojedinih pitanja. Tu su izlaganja Mustafe Begića, Goce Anđelka, Arnautović Kemala, Molek Petra, Camić Izeta, Krzyk Tomislava, Sadović Ismeta i Rondić Ediba. Uslijedile su brojne diskusije i rasprave. Dr Njegoslav Vukotić govorio je o otvorenju Trećeg stepena na Građevinskom fakultetu, a prof. Ismet Aganović o proslavi stogodišnjice Tehničke škole u Sarajevu i monografiji koja je štampana tim povodom. Čule su se mnoge korisne sugestije i prijedlozi, što je imalo svega odraza na zaključke sa ovih susreta.

U dane 23. i 24.juna održana su brojna takmičenja. Natjecale su se ekipe iz radnih organizacija, organa uprave, obrazovnih organizacija i podružnica. Vrijeme i dobri sportski tereni doprinijeli su da takmičenja prati izuzetno velik broj učesnika susreta i da rezultati takmičenja budu iznad očekivanja.

Pehari i diplome pripali su ekipama sa nešto više sportske sreće.

Pobjedničke ekipe su:

A) Mali nogomet

1. VIZURA - STUDENTI
2. GRAČANICA
3. ROMANIJA I MODRAC

B) Stoni tenis

1. PRIJEDOR
2. AGROMAP II - BIJELJINA
3. MAŠICA - ZAVIDOVIĆI I TESLIĆ

C) Košarka

1. AGROMAP - BIJELJINA
2. RMU BREZA
3. VIZURA - STUDENTI I ZENICA

D) Odbojka

1. DOBOJ
2. ZENICA
3. AGROMAP - BIJELJINA I GRADKOM - SARAJEVO

E) Streljaštvo

1. ZENICA
2. DOBOJ
3. TREBINJE

F) Šah - pojedinačno

1. PRODANOVIĆ MILOŠ
2. AMIDŽIĆ DRAGUTIN
3. LUKIĆ MARKO

G) Šah - ekipno

1. AGROMAP - BIJELJINA
2. MAŠICE - ZAVIDOVIĆI
3. GRADKOM - SARAJEVO

Takmičenja su protekla u sportskoj i fer borbi.

Pehare i diplome pobjedničkim ekipama i pojedincima dodijeljeni su prilikom zajedničke večere.

Zajedničkoj večeri prisustvovali su svi učesnici Susreta. Domaćin se pobrinuo za jedno nezaboravno veće. U ugodnoj atmosferi, uz zabavu, muziku i pjesmu ostalo se do kasno u noć. Ugođaj je začinjen pjesmama naše kolegice Spahić Kaseme-Seke i kolege Unkić Hamdije - Zoge.

Dodatni sadržaj zajedničke večere je bila i bogata tombola.

Susreti su završeni 24.juna usvajanjem Zaključaka, srdačnim pozdravima i porukama - doviđenja u junu 1991.godine, ponovo na Igmanu.